

DECANUS <sup>4.</sup>  
COLLEGII ICTORUM  
IN ILLUSTRIS ACADEMIA  
VVITTEBERGENSI

SAMUEL STRYKIUS, JC.  
SERENISSIMOR. ELECTOR. SAX. &  
BRAND. CONSILIARIUS & ANTECESSOR

AD  
ORATIONEM SOLENNEM

CLARISSIMI CANDIDATI,  
Dn. CHRISTOPHORI CAHLEIS,  
Lesnitio-Schönburgiaci,

*Futura Martis die Hora IX. matutina*

*De Regibus:*  
IN

AUDITORIO ICTORUM  
HABENDAM

OMNES LITERARUM PATRONOS & CULTORES  
INVITAT.

---

WITTEBERGÆ,  
Typis JOHANNIS MICHAELIS GODERITSCHII, 1691.



**R**egalium nomen frequens admodum hodie est, & vulgo etiam notissimum. Quippe non in solis Regum, Principumque scriniis hæc ventilatur materies, sed ad inferiores etiam Dominos, feudi titulo, non pauca ex Regalium numero transiverunt. Quod si initia horum Jurium inquisiveris, vix certi quicquam asserere licebit. Non desunt quidem, qui ex ipsa Regia Lege *1. Sam. 8.* à summo regnorum conditore DEO præscripta, nec iniquitatis incusanda, nisi iniquus accesserit interpretes, Regalium arcessunt principia: Verum si omnia Legibus quæ sita Jura Regalium nomine comprehendenda, à primis totius orbis Regibus repetenda forent incunabula. At vero hæc ipsa Majestatis jura sunt, quibus ante duo demum secula Regalium appellatio tributa, & ex eo tempore Politicorum libellos occupavit distinctio inter Regalia majora & minora. Sed eminentiora omnino sunt, Majestatica illa Principum Jura, ad ipsius Reipublicæ regimen, salutemque, belli pacisque tempore moderandam tendentia, quam ut vulgari Regalium vocabulo, non paucis Nobilium juribus communi, insigniantur. Illa ergo nostræ disquisitioni remanent Regalia, quæ Fiscis vulgo dicunt compendia, & jam olim ab Abb. Urspergensii *ad Ann. 1109.* Regum Fiscalia nuncupata, quæ Principes in bonis quoque privatorum non raro sibi vindicant, quorum seriem enumeravit Fridericus Imp. *C. 40. 2. Feud. 56. quæ sint Regal.* Horum sane principia obscura admodum sunt, & si verum fateri fas est, non nisi barbaris Regibus Imperii Romani hostibus atque de,

prædatoribus, belli quodam jure citra respectum salutis publicæ introducta. Quippe si Legum Romanarum providam dispositionem intueamur, tanta Populi Romani, imo ipsorum quoque Imperatorum, Monarchica licet libertate sine exemplo instructorum, non saltem in sibi subjectos, sed & armis subactos Cives clementia ac benignitas fuit, ut non facile quicquam sibi vindicaverint ex commodis privatorum, nisi legitimo quodam titulo, vel in pœnam commissi sceleris, res ad Fiscum devoluta. Nihil fere ex illis, quæ Regalibus annueramus hodie, olim Principibus adscribebatur, sed unumquemque rebus suis juribusque frui libere permittebant. Venari in suo unicuique indulgebatur, imo nec in alieno. penitus interdictum erat. Aucupia patebant promiscue omnibus, & piscari in mari fluminibusque quilibet vi libertatis naturalis poterat. Nec reconditos sub terra thesauros sibi asserebat Fiscus, sed inventori, si loci publici ratio non obstar, relinquebat integros. Reliqua etiam in terræ visceribus nata commoda eadem libertate percipiebantur. Unde metalla in proprio fundo inquirendi potestatem ille etiam habebat, cui fundi non dominium, sed ususfructus saltem compete-  
*bat, L. Fructus 7. §. 13. ff. solut. matrim. L. 9. §. 2. & 3. ff. de usufr.* Nec in vilioribus metallis, sed auro pariter & argento id juris compete-  
*bat. Poterat enim fundi usufructuarius auri & argenti fodinas instituere, vel quas dominus proprietatis instituisset, libere exercere, L. 13. §. 5. ff. de usufr.* quæ & alia jura subterranea per compendium recenset Ulpianus in *L. 3. §. fin. ff. de rebus cor. qui sub tut.* dicendo: *si lapidicinas vel quæ alia metalla pupillus habuit, stypteria,* (quod alumen denotat *πυρρὸν τὸ στυπτερόν*, quod de illis dicitur, quæ, dum gustantur, linguam adstringunt, teste Dioscor.

*Lib. 5. cap. 123.) vel cujus alterius materia* (Salinas addit in l. 5. d. t.) *vel secretifodinas, argentifodinas, vel quid aliud huic simile; quæ quidem verba restringit Paulus Ictus in seq. l. 4. ff. de reb. cor. his verbis: quod tamen privatis licet possidere;* ex quo colligendum videbatur, non omnia subterranea tunc temporis privatorum arbitrio & moderamini supposita fuisse. Merito tamen Pauli verba ad argenti fodinas in locis publicis referenda: Hæc enim jam olim Principis erant ex veriori sententia, de qua Rebuff. *ad L. 17. §. 1. ff. de V. S.* Ex privatorum vero metallifodinis Principi præter canonem metallicum nihil præstabatur, reliquum omne privati fodientes sibi vindicabant, *L. 3. C. de metall.* Verum libertas illa, naturali jure privatis tributa, & per Leges Romanas ipsis confirmata, cum Juribus aliis Regalium titulo ad Principes transiit, nec privatis quicquam remansit, nisi quantum indulgentia Principum ipsis concesserat. Aliena itaque à Jure Romano hujus generis Regalia sunt, nec Autores alios agnoscunt, nisi qui in perniciem Imperii Romani nati factique; Longobardos puta, inòx devicta Italia belli quodam jure hæc & alia privatorum commoda, Gentium Civilique jure ipsis quæsitæ, sibi adscribentes. Ab eo tempore Regalium nomen invaluit, quamvis in feudorum consuetudinibus nuspiam usurpatum, & in ipsis Longobardorum legibus, quæ adhuc extant, fere semel tantum occurrat. Horum exemplo Imp. subsequentes eadem sibi vindicarunt jura, & ne vagus eorum numerus esset, à Friderico I. Imp. ut quidem videtur, qvamvis illa restrictio displiceat aliis, determinatus. Post Friderici discessum Imp. ubicumque tandem occasio se obtulit, irritamenta illa malorum, opes scilicet effodiendi, jus hoc sibi per mandata vindicarunt. Exemplum ejus rei exhibet Goldastus



*Tom. 3. Const. Imper. p. 362. ubi Henricus VI. Imp. anno 1189. ad Episcopos Mindensem, Paderbornensem, Osnabrugensem, Comitesque & Nobiles illarum Dioecesium rescripsit: Cum omnis argentifodina ad Jura pertineat imperii, & ad regalia nostra sit computata, nulli venit in dubium, quin ea, quæ nuper in Episcopatu Mindensi dicitur inventa, ad nostram totaliter spectet distributionem, unde in ea nulli hominum quicquam Juris recognoscimus, nisi hoc à nostra liberalitate valeat specialiter impetrare. Successu temporis metallorum Jura ad Imperii Electores & Principes liberalitate Imperatorum devoluta, quorum quisque in suis postea territoriis modum rebus metallicis præscripsit, quousque cives reliqui in consortium hujus lucri admittendi sint vel non. Verum enim vero, cum commoda hæc subterranea Principibus nostris vindicata sint, ipsorum officio incumbit quam maxime, providere, ne sub hoc prætextu penitus eripiant civibus agrorum suorum connata commoda. Quæsitum inde memini, an in Regalibus latior interpretatio, an strictior sit admittenda, de quo in casu obveniente, an scil. Princeps Vassallum in fundo suo fornacem calcariam exstructurum, cum hujus generis lapides coctiles illic reperiret, prohibere possit, sub prætextu Juris regalis metallici, gravissime disceptabatur. Equidem negari nequit, metallorum appellationem satis amplam esse, adeo, ut ex aliquorum sententia omne commodum complectatur subterraneum. Ast iniquior hæc visa est sententia: Ut enim supra assertum; Regalia fere omnia diminutionem quandam juris continent, quod antea populi erat, & vel spontanea civium abdicatione, vel armorum jure, vel denum præscriptione Principibus quæsitum: Omnia vero hæc strictissimæ interpretationis sunt, imo odiosa pleraque,*

ut ea propter illa commoda æquissime relinquuntur ci-  
vibus, quæ Principi in specie acquisita esse, non apparet.  
Contra autem nec permittendum civibus, ut illa, quæ  
Principibus semel acquisita sunt, invadant, vel frau-  
dulenter circa illa in perniciem publicam versentur.  
Nullibi certe lætior fraudum seges est, quam circa ipsum  
Jus metallicum, & huic plerumque connexum Jus mo-  
netarium, quod in publico privatoque hodie quæstu est,  
imo eò prohdolor! improbis rei monetariæ operantium  
ausibus deventum, ut quod Principibus ne quidem per  
Leges Imperii licet, ipsi rei metallicæ monetariæque  
privati conductores cum insigni totius Imperii damno  
sibi vindicent. Qua de re innumera in Comitibus Imperii  
universalibus & Diætiis Circularibus exaudiuntur que-  
relæ. Et de hoc negotio dicturus est publice, cujus gratia  
hanc suscepimus scriptionem, Clarissimus noster Candi-  
datus Dn. CHRISTOPHORUS CAHLEIS, de cujus  
natalibus studiisque more in Academiis recepto quæ-  
dam edisserenda. Natus est ille Lefnicii, in oppido  
Schönburgico, Anno à nato Salvatore M DC LXVIII.  
diè XVII. Junii. Patrem adhuc hodie superstitem habet  
Amplissimum Prudentissimumque Virum, Dn. CHRI-  
STIANUM CAHLEIS, Consulem illius loci meritissi-  
mum, pariterque Mercatorem satis conspicuum. Ma-  
ter ejus est à sexus sui dotibus Commendatissima Fœmi-  
na, REGINA ex HARZERIANA familia honestissima  
pariter & Clarissima sanguinem derivans. Ab his Pa-  
rentibus honestissimis à prima infantia literis destina-  
tus est Noster, & a quinto ætatis anno partim privato-  
rum, partim publicorum Præceptorum informatione  
in humaniori literatura usus est; ubi grata adhuc memo-  
ria recolit fidelem Dn. M. LEHMANNI & CHRISTIA-  
NI PLATONIS, illius Rectoris, hujus ConRectoris in  
Schola

Schola Annæbergenſi manuſductionem, & inde ſibi par-  
tos ſtudioꝝ profectus, quos Anno MDC LXXXI. di-  
fertiffimus Gymnaſii Sittavienſis Reſtor Dn. WEISIUS  
per quadriennium integrum expolivit ulterius, & ad il-  
lam maturitatem deduxit, ut Anno M DC LXXXV. d.  
XXII. Maſi illuſtris Philuræ Muſas ſalutare potuerit. Na-  
ctus ibi Præceptorem in Philoſophiæ ſtudio eſt, Theo-  
logum pariter & Philoſophum celebratiſſimum, ſumme  
Reverendum Dn. VALENTINUM ALBERTI, cujus  
auſpiciis Practicam Philoſophiam feliciter abſolvit. Ju-  
riſprudentiam vero hauſit ex ore Celeberrimorum &  
Excellentiſſimorum Virorum Dn. D. SCHWENDEN-  
DORFFERI, Dn. D. ANDRÆ MYLII, Dn. D. BERGE-  
RI, Dn. D. ITTIGII Dn. D. ROESNERI  
Dn. D. PHILIPPI, quibus Doctõibus ſingulas Juris  
privati & Feudalis partes abſolvit, pariterque Prælectio-  
nes publicas Illuſtris Dn. BORNII, ad Franciſci de Roye  
Jus Canonicum aſſidue frequentavit. Ne vero privati Ju-  
riſ Studio tantum ſe mancipaſſe videretur, Hiftorias re-  
rum in orbe geſtarum ad methodum Introductionis in  
Hiftoriam Univerſalem Nobiliſſimi Dn. de Puſendorff  
hauſit ex ore Excellentiſſimorum Virorum Dn. RE-  
CHENBERGII, & Dn. FRANCKENSTEINII. Hiſce  
junxit Collegia Excellentiſſimi Dn. MENKENII ad  
Monzambanum de ſtatu Reipublicæ Romano - Ger-  
manicæ, nec non ad Lampadii ejusdem argumenti Tra-  
ctatum, ex quorum Virorum inſigni doctrina ſe pluri-  
mum profeciſſe gratiſſima mente gloriatur. Hiſ ita ab-  
ſolutis cum occaſio ſe commoda offerret, peregrinas  
viſendi regiones in comitatu Illuſtriſſimi cujuſdam Pa-  
troni, non levi febricula, ſed ardentiffima correptus, per  
ſemeltre integrum Lipſiæ ipſi decumbendum fuit, unde  
non vulgaria ſtudioꝝ impedimenta ſenſit. Poſtquam  
vero ſibi reddito, noluit à cepto ſemel ſtudioꝝ curſu

desistere, hinc ad Academiam Viadrinam se contulit, ubi nostras non tantum Scholas frequentavit sedulo, sed & ab ore Nobilissimi & Excellentissimi Dn. PETRI SCHULTZII, Jcti celeberrimi, Collegæ quondam nostri conjunctissimi, pependit, eundemque Dn. Schvvea- dendörfferi Actiones Forenses erudite exponentem audivit, & apud Consultissimum Dn. D. SCHÖPFERUM, Lauterbachii Compendium Digestorum repetiit. Hisce junxit Prælectiones accuratissimas utilissimasque Celebratissimi Dn. D. BECMANI, ejusdem Academiæ in præsens Rectoris Magnifici, Fautoris nostri æstumatissimi, ad Hugonis Grotii de Jure belli & pacis Libros. Quibus feliciter expeditis Patriã repetiit, & in ejus proximique salutem impendere studia sua decrevit, initium facturum à perorandis Clientum causis. Cum vero saluberrima Constitutione Electorali Saxonica imposte- rum ad fori conflictus admittendus nemo, qui non publica Collegii Juridici testimonio fidem legalis scientiæ fecisset, ad Almam hanc se contulit, studiorum præmia petiturus. Eo fine nomen apud Collegium nostrum professus, & prævia accurata in profectus ejus inquisitione inter Candidatos receptus, facultasque ipsi facta, exant- latis reliquis speciminibus publicis ad Licentiam Docto- ralem aspirandi. Quamobrem futura Martis die hora IX. ante meridiem, *De Defraudationibus Metallicis* in Auditorio Jctorum perorabit publice; post meridiem hora III. *L. De atate ii. ff. de interrogationib. injur. fac.* Læctionibus cursoriis, illo & sequentibus diebus, exposi- turus. Huic instituto ut prolixo adfectu faveatis, præsen- tiamque vestram illustrem honorificamque Clarissimo Candidato concedatis, à Vobis, Magnifice Universitatis RECTOR, Perillustres Dn. BARONES, Excellentissimi Universitatis PROCERES, Civesq; Generosi & Nobilis- simi, quo par est, obsequio & cultu rogo contendoque.



